

Noticia
Transparente
di Gobierno

ISLA ONLINE

Diabierna 12 Januari 2024

Email: IslaOnline@gobierno.aw Tel: 528-4952



ARTE DI MURAYA
SAN NICOLAS



Gabinete Wever-Croes



Den su discurso durante e recepcion tradicional di aña nobo GOBERNADOR DI ARUBA A REFLEHA RIBA E AÑA CU A PASA CU VISION RIBA AÑA 2024



Prome Minister Evelyn Wever-Croes hunto cu algun colega Minister Y Parlamentarionan, a asisti na e recepcion tradicional di aña nobo di Gobernador di Aruba Su Excelencia Alfonso Boekhoudt na Cas Ceremonial. Prome Minister a expresa cu Gobernador den su discurso a repasa aña 2023, cu tabata un bon aña den diferente sentido, y a expresa cu indudablemente lo tin retonan e aña aki tambe. Sinembargo, Prome Minister a enfatisa, hunto nos por enfrenta tur reto.

Gobernador di Aruba a cuminsa su discurso enfocando riba e bon relacion di Aruba cu e Famia Real, mencionando e bishita di Su Mahestad Rey Willem Alexander, Su Mahestad Reina Maxima y nos Kroon Prinses Su Alteza Real Prinses Amalia y e bishita na final di Aña di Su Alteza Real Prinses Beatrix.

Gobernador a pone enfasis riba e recuperacion y crecimiento di nos economia despues di e pandemia y a elogia nos Gobernantenan, sector priva y tur NGO's pa e bon trabou haci durante e crisis aki. Turismo a aumenta pa prome biaha desde e pandemia, esaki compara cu cifranan prome cu pandemia. Tambe el a remarca cu e economia di Aruba ta beneficia enormemente di esaki.

Gobernador a enfatisa riba economia di nos pais bisando cu e crecimiento den economia tambe ta significa un responsabilidad grandi pa Gobierno tene e finanzas publico stabile y a referi na institutonan financiero mundial y CAFT. Basa riba e ultimo informe di IMF (International Monetary Fund), economia di

Aruba a crece cu 8% durante 2023. Segun CAFT esaki por yuda reduci debenan existente y tambe ta bon pa inversionnan cu lo yuda e crecimiento ya existente y haci nos economia mas resiliente.

Tambe Gobernador a enfoca riba flora y fauna di nos Pais y a bisa cu mester haya e balance entre progreso responsabel y e cuido di nos naturalesa.

Tin varios organisacionnan trahando duro pa cuida y preserva e naturalesa di Aruba.

Por ehempel a regula e transito di vehiculo den Parke Arikok y tambe e proyecto di e re-introduccion di nos lora a start y ta wordo vigila di cerca pa Su Alteza Real Prinses Beatrix.

Nos naturalesa tambe ta un pilar importante di nos industria di turismo y sigur pa e turistanan y tur hende cu kier relaha y disfruta di esaki, Gobernador a menciona.

Gobernador a sigui bisa cu e prosperidad di un pais no necesariamente significa bienestar pa tur hende. Tin varios proyecto y iniciativanan andando pa combati e pobreza y haya un balance. Esaki ta un tarea importante di e gobierno pero tambe di henter e comunidad. Nos tur por yuda unda nos por. Terminando su discurso Gobernador a papia di e importancia pa alcanza metanan, esaki ta cu union y respet pa opinion di otronan y tolerancia.

Prome Minister ta gradici Su Excelencia Alfonso Boekhoudt pa un discurso hopi bunita y inspirativo. E aña aki, Gobierno a declara como aña di Stabilidad y Prosperidad crea a base di inversion y innovacion.

“Meta di Gabinete Wever-Croes II ta pa nos logra establece un isla cu un economia productivo y stabiel, un pais cu por paga su debenan y alaves inverti den su futuro, pa crea oportunidadnan pa nos futuro generacionnan realisa nan soñonan. Un isla cu un desaroyo sostenibel y husto, cu por brinda un calidad di bida cu salud, progreso y felicidad pa un y tur, specialmente pa esnan mas vulnerable. Un comunidad cu ta trata otro cu respet, cu tolerancia y cu ta inclui tur hende den e progreso y prosperidad”, Prome Minister Evelyn Wever-Croes a expresa.

NOS META PRINCIPAL

Nos a logra nos metanan di recuperacion y crecimiento economico. Pero nos meta no tabata pa mira solamente crecimiento economico y recuperacion, esey tabata e forma pa logra e meta real; y e meta real ta crea cuponan di empleo pa mama y tata nan di famia, pa crea oportunidadnan pa nos hobennan desaroya y bira exitoso, pa trece tranquilidad bek den nos hogarnan.



Gabinete Wever - Croes II

PROME MINISTER

Evelyn Wever-Croes

Discurso Nacional, 2023



ANUNCIO IMPORTANTE DI MINISTERIO DI SALUD: TEMPORALMENTE HOSPITAL A POSPONE OPERACIONNAN



Minister Dangui Oduber ta informa cu Dr. Horacio Oduber Hospital (HOH) a pospone temporalmente tur operacionnan regular di hospital. E decision aki ta debi na e capacidad actualmente di e cambernan, cu ta limita. Esaki ta bin door di entre otro trabounan di construccion cu ta tumando luga na hospital, ma tambe door di un subida di personanan cu mester wordo interna cu urgencia door di accident of malesa. Pa duna prioridad na e cuido y bienestar di pashentnan cu ta yega HOH cu urgencia y cu mester opera urgente, a dicidi pa pospone temporalmente e operacionnan regular di hospital.

Mientras Hospital ta traha pa atende cu e restriccion di capacidad, Minister Dangui Oduber kier enfatisa na pueblo e importancia di mantene bo salud. Ta crucial pa pone atencion na prevencion contra sintoma di griep y pa mantene habitonan saludabel manera;

- Come cumindanan nutritivo

- Participa den ehercicio regular
- Duna prioridad na bo salud mental
- Bebe vitamina
- Bebe hopi awa
- Elimina sucu excesivo
- Elimina alcohol excesivo

Di biaha Minister Oduber ta tuma e oportunidad pa recorda pueblo, awo cu nos ta den e temporada di Carnaval, pa keda hidratada y evita consumo di alcohol den exceso. Bo seguridad y e seguridad di otro ta di suma importancia.

Minister Oduber ta conta cu pueblo su comprension, cooperacion y compromiso cu bienestar di henter comunidad durante e periodo di Carnaval. Minister Oduber ta termina bisando cu e ta desea cada un persona pa tin un bon salud & y corda ariba seguridad di un y tur. ■■■



MINISTER

Geoffrey Wever

A INFORMA PARLAMENTO DI ARUBA RIBA PROYECCION DI INFLACION PA 2023 Y 2024



Awe 11 di januari 2024 durante un Openbare Bijeenkomst Minister Geoffrey Wever hunto cu Departamento di Asuntonan Economico, Comercio y Industria a duna Parlamento di Aruba un update di e Economic Outlook 2023-2024. Den e publicacion riba proyeccion economico Departamento di Asuntonan Economico, Comercio y Industria ta presenta tambe e expectativa pa e nivel di prijsnan na Aruba.

Den e Economic Outlook di juni 2023 Departamento di Asuntonan Economico, Comercio y Industria a premira inflacion di 4.4 por ciento den 2023 y 3.2 por ciento pa 2024.

Segun e December Economic Outlook 2023- 2024 Departamento di Asuntonan Economico, Comercio y Industria ta premira cu inflacion den 2023 lo tabata 3.6 y ta premira pa 2024 un inflacion di 3.5 por ciento.

E calculacionnan pa inflacion ta basa riba e ultimo informacion disponibel. E nivel di prijs premira na Aruba ta den liña cu calculacionnan di International Monetary Fund pa no solamente Aruba pero tambe pa dos partner comercial grandi Merca y Hulanda.

International Monetary Fund den su World Economic Outlook di Oktober 2023 ta premira un inflacion na Merca di 4.1



por ciento den 2023 y pa 2024 2.8 por ciento. Den 2022 segun International Monetary Fund Merca a conoce un inflacion di 8.0 por ciento. Pa loke ta trata Hulanda, International Monetary Fund ta premira un inflacion di 4.0 por ciento den 2023 y pa 2024 4.2 por ciento. Hulanda a conoce un inflacion di 11.6 por ciento den 2022. Pa Aruba International Monetary Fund ta premira pa 2023 un inflacion di 4.5 por ciento y pa 2024 un inflacion di 2.3 por ciento. Den 2022 inflacion tabata 5.5 por ciento na Aruba segun Centraal Bureau voor de Statistiek.

Por deduci cu pa 2024 proyeccion di inflacion na Aruba ta sigui e desaroyo internacion: pa 2024 ta premira un nivel di prijs relativamente mas abao cu 2022, un año cu economia mundial a experiencia inflacion bastante halto.

Ministerio di Asuntonan Economico, Comunicacion y Desaroyo Sostenibel conhuntamente cu Departamento di Asuntonan Economico, Comercio y Industria lo sigui monitor e nivel di prijs na Aruba y desaroyonan internacional.

Minister Geoffrey Wever kier gradici directora Maria Dijkhoff-Pita y e afdeling Economisch Beleid en Onderzoek cu ta haci e economic outlook y calculacionnan di inflacion posibel.

E publicacion completo ta disponibel riba e website: www.deaci.aw.



E AÑA AKI 55 HOBEN LO HAYA E OPORTUNIDAD PA FORMA PARTI DI CUERPO POLICIAL DI ARUBA



Diabierna mainta, hunto cu Korpschef, minister di Husticia y Asuntonan Social sr. Rocco Tjon, a bishita scol di Polis na San Nicolas, pa asina duna bon bini na e klas di young professionals cu a inicia cu nan trayecto nobo pa comberti den polis.

Manera ta conoci, semper na inicio di aña, ta bishita tur e diferente wardanan di polis pa asina por scucha for di e personal mes kico ta e necesidadnan y retonan cu nan tin, pa asina wak con ta incorpora esakinan tambe den e plan strategico di Ministerio di Husticia y Asuntonan Social, cual ta wordo ehecuta cada aña. A inicia e trayectoria di bishitanan, cu Scol di Polis na San Nicolas, caminda a combersa cu e director suplente, e diferente docente y a yama bon bini na e klas nobo cu a cuminsa dia 3 di januari.

Un momento sumamente importante, mirando cu Ministerio di Husticia y Asuntonan Social ta inverti hopi den material, infraestructura pero hopi importante tambe ta pa cuminsa recluta mas personal pa e ekipo di Cuerpo Policial di Aruba, pa asina por cuminsa traha pa mitiga e falta di personal cu tin actualmente. Esaki ta e prome klas, y manera ta conoci den presupuesto di 2024 a incorpora un fondo di desaroyo, esta un groeifonds, pa asina por recluta mas personal pa henter e cadena hudicial. Na Augustus dos klas mas lo bay inicia na



scol di Polis, pues e aña aki so ya caba a percura pa alrededor di 55 polis adicional wordo recluta y cuminsa cu nan opleiding.

Banda di esaki, tin diferente otro proyectonan andando, manera ta conoci ta colaborando mas cu sector priva, caminda na fin di aña pasa, a lansa e Aruba Tourism Security Patrol caminda Cuerpo Policial hunto cu sector priva, companianan di seguridad ta traha hunto pa di e forma aki brinda mas facilidad y na mes momento garantisca orden publico y mas seguridad na henter comunidad di Aruba.

Cuerpo Policial ta mei mei di un reorganizacion, Korpschef ta liderando henter e proceso aki, e organizacion ta bay bira uno mucho mas dinamico, e ta bay brinda mucho mas oportunidad tambe na tur esnan cu ta traha na Cuerpo Policial di Aruba. Aña pasa so alrededor di cuarenta opleiding a wordo brinda na personal, pa asina nan sigui desaroya nan mes y nan por adapta y brinda un contesta mucho miho na e demanda cu ta bin riba nan y e organizacion aki.

Por ultimo, e mandatario a expresa cu e ta sumamente satisfecho cu e prome paso, caminda a inicia cu e prome klas nobo pa Cuerpo Policial, y na Augustus 2024, cuarenta polis mas lo inicia cu nan opleiding. Hopi exito na tur nos hobennan cu e trayecto aki. ■





Gabinete Wever-Croes

Pa cada ciudadano di nos pais, Arte di Muraya na San Nicolas ta un recordatorio, cu hunto nos por cambia e ordinario den algo extraordinario. Laga nos admira e artenan aki cu curasonnan habri, permitiendo e beyesa di e murayanan activa nos imaginacion y inspira nos pa crea un pais mas colorido, bunita y conecta.

2024

AÑA DI STABILIDAD Y PROSPERIDAD